

't kump met gebrèken !

Van mien generasie en völle van döörveur weten der aover mèè te praoten. De bepärkingen die older wörrende lichems ondervinnen bi'j 't toenemmen van de jören. En degenen die 't dan aoverkump eur ie altied zeggen:

Old wörren is gien kunst . . . old wèèn is wat anders !

Maer a-j weten dät klagen gien zier elpen . . . wöörumme zo-j dät dan toch doen ?

In de 60-er jören . . . met de opkomst van de bejöördten te-uuzen . . . > mossen die olderen eerstens un eigen vermogen of uus opèten veur zij der mochen komen wonen. Mien va ef 't vrogger vaak genog ezech . . . > *een bakstien leg nogal zwöör op de mage . . . > maer misskien is een dakpanne nog wel lekkerder . . . a-j der maer genog opdoet ! . . . > op een öltien bieten kan altied nog !*

Ik wiere onlanks e-confronteerd met een medärne meniere van lèèftied-discriminatie. Niet dä-k nou al zo old binne, *nog maer 76 . . . en komme dus net kieken*, maer de uidige maatskopp'i'je is de generasie van de wederopbouw an 't ofdanken.



Ie kennen die kretologie wel . . . > die olde kadavers skieten nooit op en lopen altied in de weg . . . > bint zo traag as dikke stront in een nauwe trechter . . . > ebben de ele dag de tied, maer mutten altied op 't drukst van de dag boskoppden doen . . . > kunnen gien autori'jen . . . en zo 't toch doen, rieden ze altied veuran in de file . . . zukken mossen ze 't riebewies ofpakken . . . > die olden kosten allenig maer geld . . . en maeken de gezond-eidszörg onbetaalbaer!

Of . . . > mu-j ies kieken oevölle van die Campers rondrieden . . . en wat die dingen kosten . . . wöör doet die luu 't van ? *(en der bint ter nog wel een paer)*

An de andere kante: De commercie richten zich al jörenlank op de babyboomers. Die generasie is meistens zunig ewest en ef espöörd, umdät zij de wetenskap ebt . . dät ter maer weinig oeven te gebeuren en dan is 't inies aover met de pret.

Dus wat gaot ze doen . . . preberen van die olderen de gelden of-andig te maeken. **Met streuperige veraelties en sliemerijje** alles in 't wärk stellen umme oe aover te aelen, veur (te) völle geld iets an te skaffen, ook al ku-j eel goed zonder. A-j döör gevuulig veur binnen, mu-j wel weten dät van oe wörren verwacht dät ant 't ende van oew geld, ie gewoon disse aerde verlaot.

Zand ter aover . . . en niet meer aover lullen!

Veur mi'j is dät gewoon ongenueanceerd geleuter en ook niet iets umme mi'j al te druk aover te maeken.


As de jeugd de toekomst ef . . . *Zo die der veur unnie nog zol kommen ? . . maggen ze die van mi'j ebben.* Wi'j weten allange dät un tied nog wel kump. As ze 't wiel steeds opni'j willen uutvinnen . . . ***gao oe gank . . en zuuk 't lekker zelf uut !***

Ik ebbe niks an mien geliek, maer de wereld is druk bezig naor de verdommenis te gaon. Maer ach . . . dät is ook niks ni'js.

In **Babel** ef ook al ies een toren estaon en **de piramide van 't kapitalisme** ef ter zo lankaemerand een extra niveau bi'j e-krègen van een **närcist** die nogal graag oog van de toren wil blaozen.



As bloeme kan ik een trompetnärcis nog wel waerden, maer zo'n Trumpetnärcist is ärger dan de duvel zelf.



Le Capitalisme

CAPITALISM

Nous vous gouvernons

WE RULE YOU

Nous vous trompons

WE FOOL YOU

Nous vous fusillons

WE SHOOT AT YOU

WE EAT FOR YOU

Nous mangenons pour vous

WE WORK FOR ALL

Nous travaillons pour vous tous

WE FEED ALL

Nous vous nourissons tous

PYRAMID OF CAPITALIST SYSTEM

La Pyramide du système capitaliste

ISSUED BY NEDELJKOVICH, BRASHICH AND KUCHARICH.

Copyrighted 1911 by The International Pub. Co., 1747 W. 25th St., Cleveland, O., U. S. A.

En wat döt de massa ? . . . Die maken zich zörge of ze nog wel of niet op (vlieg,-)vekansie kunnen gaon . . . en maer ouwe-oeren op TV . . . iederiene is (*ervaering,-*)deskundig . . . maer gieniene die de oplössink gèf of ef.

Ook ik be-eure töt de alsmaer groter wörrende groep mensen die de TV-journaals en al die praotpreprogramma's niet meer oeven te zien. Zo lankaemerand wörren wi'j apathisch veur al dät ieuwige geweld en al die (*kl-*)zakken die zo neudig un kop veur de camera's willen laoten zien . . . met de gedachen . . . kiek mi'j ies belangriek wèèn. ***Kotsmisselijk zo-j der van wörren !!***

Maer ik wolle 't elemaole niet aover die maotskappelijke ontwikkelingen ebben, . . . althans niet die negatieve.

Mien confrontasie met lèèftied discriminasie.

Ik ebbe de leste jören een bettien te völle geld an de kinderen edaon . . . (*die können 't bèter ebruken dan ikke*) . . . zodät mien reserves opraken. Maer 't plotselink e-confronteerd wörren met de kosten veur uut te voeren groot onderold van mien (*eigen-*) uus . . . stappen ik 't kantoor van de banke binnen met de vraoge o-k wat geld konne lienen . . . ***now niet dus !***

Meneer; ***u bent 72 geweest en dan verstreken wij geen kredieten meer !***

>> *toch jammer dät 't bankwezen Dirk Skeringa buiten spel ef ezet . . .*

--- hoe bedoelt u dat ?

>> *now ik ebbe geld neudig veur groot onderold van mien uus . . . en bi'j DSB deden ze der vaste niet zo meulijk aover.*

--- U heeft een eigen huis ?

>> *Jao*

--- maar u heeft helemaal geen hypotheek !

>> *Klopt . . . al 30 jöör niet . . . is dät ärg dan?*

--- Oh . . . dan wil ik toch wel even met een collega overleggen . . . koffie ?

Wie gien skulden ef en niet bi'j BKR bekend is *BESTIET GEWOONWEG NIET !*****

(welkom in de medärne financiële wereld !)

As oldere, baoven de 72, ku-j niks meer lienen, maer willen ze oe wel een hypotheek met därtig jöör looptied ansmeren zonder meugelijk-eid op vervrogde oflössink. (opèèt-hypotheek – aoverweerde hypotheek – en nog wel een paer) Ik waere der met 't bankwezen wel gauw met klöör . . . **zuuk 't èven lekker uut !**

Ik bin op een redelijk ni'j fenomeen e-stuit. 't Bestiet nog maer zo'n twee jöör en ook al wörren der op 't internet zo ier en döör in negatieve zin veur ewaerskouwd . . . > ik ebbe der nog gien stèèk-oldende valkoele in kunnen ontdekken.

Nao wat notaeriële beslommeringen . . . zo mosse ik een akte van ärfrecht aoverandigen . . . die is ter nooit ewest en ik wolle veur z'n € 1000,- an kosten, der ook gieniene laoten opmaeken. . . le redden oe maer met 't testament van de vrouwe !

Volgende vraoge: . . Volgens gegèvens bi'j 't kadaster wonen mevrouw (reeds vier jöör dood) nog steeds op etzelde adres . . ? ? ? . .

Ik konne unnie allenig maer bevestigen dät mothers de vrouwe ier in de kamer stiet en dat dät ook zo zolle blieven !



Maer goed: . . Ook döör mos een notaeris veur worren in-e-skakeld umme dät te kunnen royeren (=skrapen of deuralen)

En a-k dan, *nao wat gemoster*, toestemming gève "**dät – wat neudig**" is te regelen; ontdekken zij weer wat ni'js ! . . der stiet nog een hypotheek van € 30.000,- open . . . of ik maer èven wil zörge dät ter een verklörink van oflössink van de banke kump ??

Oezo ?? . . . ik ebbe die hypotheek nooit e-ad en zelfs de banke weten der niks meer van. Maer de vermelding kan allenig deur een notaeris wörren eroyeerd.

Kun ie 't now nog volgen ? . . . ken ie der now nog bi'j ? . . . as ie 't now nog snapt . . . dan snap ie meer dan mi'j ! (Farce Majeur – 1968)

Een punteufd zo-k der van krieggen !

Maer uutendelijk is 't allemaole terechte ekommen en de notaeriële akten bint e-passeerd.

Dus bin ik met **“Welvarend Wonen”** uut Almere, in zee egaon . . . ***Ik ebbe de keet verkoch !*** . . kriege ierveur elke maond een bedrag uut-e-keerd >> *as aanvulling op mien pensioen* << . . > magge der töt in lengte van daegen blieven wonen zonder (h)uur te betalen.

De uutkerink löp deur töt an mien 100e geboortedag en kan aovergaon op ärfgenamen, mochen ik eerdere uut de tied geraken.

Ik oeve dus niet te ver-uuzen . . . blieve zitten wöör a-k zitte . . . en maeke de belofte an de vrouwe ook nog wöör . . . 't blif gewoon . . **“ons thuis”**.

Zo a-k 't now kanne be-oordelen . . is dit veur mi'j toch wel een meniere umme mien uus daodwäerkelijk op te èten !

Dät 't mi'j maer maggen smaken !

juni 2026

